



REBOLUSYONARYO A PAGIWARNAK TI UMILI ITI AMIANAN-LAUD A LUZON

# DANGADANG

Ispesyal nga Isyu Disyembre 2018

Tawen 32 Bilang 7

P10.00

IPASA NU MABASA

## PARTIDO KOMUNISTA TI PILIPINAS ITI SINGKWENTA: DAGITI PABLAAK MANIPUD ITI ILOCOS- CORDILLERA



# RAMBAKAN TI LIMAPULO A TAWEN TI NABALLIGI A PANANGIYABANTE TI DEMOKRATIKO A GUBAT TI UMILI ITI UNEG TI NATIBKER A PANANGIDAULO TI PARTIDO KOMUNISTA TI PILIPINAS!

Komiteng Tagapagpaganap  
Komiteng Rehiyon ti PKP iti  
Rehiyon Ilocos-Cordillera  
Disyembre 26, 2018



Ti *Dangadang* ket rebolusyonaryo a pagiwarnak iti Amianan-Laud a Luzon iti tarabay ti PARTIDO KOMUNISTA ti PILIPINAS. Maipablaak ditoy dagiti damdamag kadagiti aksyon ti Bagong Hukbong Bayan ken dangadang ti umili kasta met ti panagamiris kadagiti isyu a pakaseknan ti umili.

Silulukat ti *Dangadang* iti aniaman a saludsod, dillaw, singasing, koresponsal ken pangkultura a parnuay tapno mapadur-as ti linaon na.

Pagtitinnulongan tayo a padur-asen ti *Dangadang*. Ti sangapulo a piso a presyo ti pagiwarnak ket bassit a donasyon tapno suportaran ti agtultuloy a pannakairuar na.

Ti intero nga organisasyon ti Partido Komunista ti Pilipinas iti rehiyon Ilocos-Cordillera (PKP-ICR), rebolusyonaryo a hukbo, dagiti rebolusyonaryo nga organisasyon masa ken intero nga umili nga idadauloan daytoy ket makikaykaysa iti intero a rebolusyonaryo a puersa ken umili a Pilipino iti panangrambak iti maika-limapulo a tawen nga anibersaryo ti pannakaitakder ti PKP. Iti daytoy nga okasyon, maikkan met laeng ti kangatuan a panagsaludo dagiti mano a ribu a rebolusyonaryo a martir ken banuar ti rehiyon nga awanan panagduadua a nangidaton iti biag da tapno maiyabante ti demokratiko a rebolusyon ti umili ken madanon ti agdama a tukad ti panagdur-as.

Iti natibker a panangidaulo ti Partido, naballigi a naipundar ken tuloy-tuloy a pimmigsa ken immabante ti armado a rebolusyonaryo a tignayan iti rehiyon ken iti intero nga Amianan a Luzon iti napalabas a limapulo a tawen. Iti nasapa a panawen iti panagrugi ti rebolusyonaryo a tignayan idi immuna a paset ti 1970's, nasungbatan ti rehiyon ti paset na iti panangted ti nailian a galad ti armado a pannakidangadang ken nangted ti kontribusyon iti panangibandera ti panangiyabante ti gubat ti umili iti intero a pagilian. Dagiti nakakaro a kontra-rebolusyonaryo a gyera nga inrussuat dagiti nagsasaruno a reaksyunaryo a rehimen manipud pay idi tiempo ti diktadura nga US-Marcos inggana itatta tapno buraken ti armado a panaglapan ti umili ken hukbo da, ket epektibo a nasango, nakapagmentinar, agtultuloy nga agur-urnong ti pigsa ken mangikagkagumaan a makigiddan iti panagabante ti intero a pagilian agturong iti pananggaw-at iti estratehiko a panagpatas.

Iti las-ud ti nasurok uppat a dekada, ti Partido iti rehiyon ket nauneg a nagramut iti naruarya a masa a mannalon ken dadduma pay a sector. Awan sarday ti

maingel a panangiyabante iti rebolusyonaryo a tignayan masa iti nailian-demokratiko a dangadang nga anti-imperyalista, antipyudal ken antipasista. Naipakitan ti rebolusyonaryo a pakasaritaan ti kinahusto ti panangidaulo ti Partido iti nainkalintegangan a panaglapan ti umili para iti karbengan ken pagimbagan da, a paset ken nairut a nakasilpo iti laban ti umili a Pilipino para iti nailian a wayawaya ken demokrasya. Sinilpoan ken indauloan ti Partido ti panaglapan ti umili kadagiti higante ken manangdadael a proyekto ti diktadura nga US-Marcos iti Cordillera – ti logging ti Cellophil Resources Corporation ken dagiti maitakder a megadam iti Chico River. Iti paset ti Ilocos, naregta a naiyabante dagiti immuna a naitakder a rebolusyonaryo nga organisasyon ti mannalon ti panangipatungpal dagiti minimum a programa ti agraryo a rebolusyon laban iti dasig nga apo't daga, particular dagiti dangadang para iti panangipababa ti abang iti daga. Babaen kadagitoy a nareregta a tignayan masa, napardas a dimmakel ken pimmigsa ti rebolusyonaryo a puersa. Ken manipud 1980's, ad-adda a pimmardas ken limmawa ti panangiyabante dagiti tignayan masa. Napardas met laeng ti panagdakel ti BHB ken manipud 1984 ket nabukel ti umuna a pormasyon a kumpanya iti Cordillera – ti Lumbaya Company, a nangiyun-una iti panangipatungpal kadagiti nareregta a taktikal nga opensiba.

Natibker a sinango ti Partido ti pananggudua ken terorismo nga insaknap ti Cordillera People's Liberation Army (CPLA) nga indadauloan ni Conrado Balweg a simmina iti BHB idi 1986. Inlawag manen ti Partido ti husto a linya kasilpo iti panang-awit iti pannakidangadang dagiti nailian a minorya iti Cordillera para iti bukod-a-pangngeddeng, ken inbutaktak ken sinuppiat ti kamali ken killo a linya nga etnosentrismo



ken micro-sobinismo nga awit-awit ti CPLA kasilpo ditoy. Napardas a nakalung-aw ti BHB iti Cordillera manipud iti panagpaksyon ti CPLA. Ken idi maikadua a paset ti 1980's ket naggil-ayab ti panangiyabante ti armado a pannakidangadang iti nalawa a paset ti Ilocos ken Cordillera. Nairussuat dagiti agsasaruno a naballigi a taktikal nga opensiba laban iti dakkel a tropa ti AFP a naibukbok iti rehiyon, PNP, CPLA ken CHDF/CAFGU. Naglak-am ti dadakkel a dangran ti kabusor kadagitoy a taktikal nga opensiba. Kagiddan ti panangiyabante kadagiti tignayan masa, napardas a naitakder dagiti rebolusyonaryo nga organo ti bileg pampulitika (OKP) iti nadumaduma a paset ti kaaw-awayan ti rehiyon, lalo iti paset ti Cordillera no sadino a naitakder dagiti tukad-ili ken inter-bayan nga OKP naregta a nakilaok iti panangiyabante ti gubat ti umili. Naitakder ti Cordillera People's Democratic Front idi 1989 nga isu ti katibkeran nga alyansa ti amin a demokratiko a dasig para iti gubat ti umili. Naibukbok dagiti nadadangkak ken dadakkel nga atake ti kabusor iti uneg ti Oplan Lambat Bitag I inggana IV ti rehimen nga US-Aquino ken ti kasaruno a rehimen nga US-Ramos, ngem amin dagitoy ket pinaay ti rebolusyonaryo a tignayan iti rehiyon.


Nairut ti panag-annugot ti rehiyonal nga organisasyon ti Partido iti naipagna a Maikadua a Naindaklan a Tignayan iti Panangilinteg (MNTP) tapno marimbawan ti kamali a linya ti Strategic Counter-Offensive (SCO) a nagipaay ti panag-atras iti maysa a tukad. Kagiddan ti panangsango iti agtultuloy nga atake ti Oplan Lambat Bitag, natibker a naiyabante ti intero a rebolusyonaryo a tignayan iti rehiyon ti IDKP iti panangilaksid ti kamali a linya, panangilinteg kadagiti kamali ken napairutan manen ti panang-iggem kadagiti basaran a rebolusyonaryo a prinsipyo. Gapu ditoy, inut-inot a nakapagpabaro ti pigsa ti Partido, Hukbo ken intero a rebolusyonaryo a tignayan iti rehiyon.

Manipud iti panagtipon ti rehiyon nga Ilocos ken Cordillera idi 1998, rimmegta manen ken

pimmardas ti kumpas ti panangiyabante ti agraryo a rebolusyon, panagbukel ti base a masa ken armado a pannakidangadang iti rehiyon. Nagbuelo dagiti dangadang masa ken taktikal nga opensiba iti umuna a paset ti dekada 2000 ken napardas a dimmakel ti BHB. Natured a nilabanan ken pinaay ti rebolusyonaryo a tignayan iti rehiyon ti inpakat ti rehimen nga US-Arroyo a naul-ulpit nga Oplan Bantay Laya 1 ken 2 ken babaen ditoy ket kumprehensibo a pimmigsa ti rebolusyonaryo a tignayan.

Ti Partido ken rebolusyonaryo a tignayan iti rehiyon ket immadaw ti nayon a pigsa iti naballigi a panangirussuat iti maikadua a kongreso ti Partido. Naregta a rimimbawan dagiti agraraira a kannawan a tendensya ti konserbatismo ken panangpigsa ti ekonomismo ken ligalismo iti napalabas a nasurok maysa a dekada bayat a natibker a lablabanan ti kinaulpit ken terorismo ti Oplan Kapayapaan ti rehimen nga US-Duterte. Iti kastoy ket magun-od ti naparpardas a kumpas ti komprehensibo a panagpapigsa ken tapno makagiddan iti kabuklan a panag-abante ti gubat ti umili iti intero a pagilian.

Napardas ti panagkarro ti krisis pang-ekonomiya ken pampulitika iti uneg ti agtultuloy a mabulbulok a malapyudal ken malakolonyal a sistema iti pagilian. Napardas met laeng a maisinsina ti tiraniko a rehimen a US-Duterte iti narua a lumablabaan nga umili. Aniaman dagiti kinarigat ken dagiti sakripisyo a sangsanguen iti mas pinairteng a kontra-rebolusyonaryo nga Oplan Kapayapaan ti rehimen, agtalek ti panrehiyon nga organisasyon ti Partido ken ti rebolusyonaryo a tignayan iti rehiyon nga Ilocos-Cordillera a babaen iti nasayaat ken natibker a panangidaulo ti PKP, awan ti dadduma a dalan a pagnaen no di ti panagabante ken panangiballigi ti demokratiko a rebolusyon ti umili ken ti panangitakder ti sosyalista a gimong iti masakbayan.



# **Naballigi a raid iti detatsment ti Philippine Army – CAFGU idiy Kalinga, sungbat iti panawagan ni Duterte a rebbeken ti BHB**



**Ka Martin Montana  
Tagapagsarita  
BHB-Ilocos Cordillera  
Enero 3, 2019**

Salsaludoan ti Chadli Molintas Command (BHB-Ilocos Cordillera) ti Lejo Cawilan Command (BHB-Kalinga) iti naballigi a reyd iti detatsment ti Philippine Army (PA)-CAFGU idiy Western Uma, Lubuagan, Kalinga a nairussuat iti parbangan ti Disyembre 23, 2018. Daytoy ti sungbat ti BHB-Ilocos Cordillera iti napangas a panawagan ni Duterte iti AFP-PNP a “rebbeken” ti BHB. Daytoy met laeng ti sungbat mi iti panawagan ti Partido Komunista ti Pilipinas (PKP) a paitengen dagiti taktikal nga opensiba laban kadagiti pasista a tropa ti terorista a rehimen ni Duterte.

Iti nasao a reyd, natay ti sarhento a kadre ti detatsment bayat a nasugatan ti tallo nga elemento ti CAFGU. Naala a dagus ti detatsment no sadino ket naklining ti tallopulo (30) a nangato ti kalibre a paltog a maibilang ti pito nga M16, pito nga M14, dua nga M4 ken 14 a riple a carbine, ken rinibu a bala.

Maysa a Nalabaga a mannakigubat, ni Roy ‘Ka BK/Rodney’ Tongdo manipud idiy Balbalan, Kalinga, ti nagmartir iti nasao a labanan. Ited ti CMC ti kangatuan a pammadayaw kenni Ka BK a nangidaton iti biag na tapno masigurado ti balligi ti nasao a taktikal nga opensiba.

Iti intero a tallo a kuarto ti tawen 2018, pinaay ti BHB-Kalinga ti nagtultuloy nga operasyon a kombati ti 50th IB a nangsaklaw kadagiti ili ti Balbalan, Pinukpuk, Lubuagan, Pasil, Tinglayan ken Tabuk sakbay a naiyakar dagitoy idiy Mindanao. Ti kakaisuna laeng a “nagun-odan” nga ipangpangas ti 50th IB ket dagiti nai-recycle a peke a panagpasurrender kadagiti mannalon kas BHB idiy Kalinga. Ti masa a mannalon ti nagsagaba kadagitoy nga operasyon a nangisaknap ti terorismo kadagiti nasao a lugar.

Nabayagen a dawat ti umili ti Lubuagan ti panangdusa iti nasao a detatsment manipud idi puersado nga intakder ti PA daytoy idiy Western Uma idi 2015. Maibilang kadagiti krimen ti yunit a nakabase iti nasao a detatsment ket ti panangpilit kadagiti mannalon nga agkameng iti CAFGU, ti

parparbo a panagpasurrender ti nasurok sangagasut a sibilyan a naiparang kas BHB, ti pananggundaway iti kababaihan ken dadduma pay nga abuso nga inaramid ti PA ken CAFGU iti karbengan ti umili.

Bayat a pumigpigsang a lumawlaw ti dangadang ti umili iti uneg ti kumarkaro a krisis pang-ekonomiya ken pangpulitika iti pagilian, adadda a rumungrungsot ken agas-asta ni Duterte ken ti AFP-PNP kas agbalbala nga aso a mangiyararamid ti kinadakes laban iti umili a mangilablabaan iti karbengan da. Daytoy ti mangidurduron iti umadadu nga umili a tumipon iti BHB ken direkta nga agpartisipar iti armado a pannakidangadang.

Ti naballigi a reyd idiy Western Uma ket paset ti panangselebrar iti maika-50 nga anibersaryo ti panangitakder iti PKP. Daytoy ti mangipakpakita nga iti las-ud ti limapulo a tawen ti panangiyabante ti demokratiko a rebolusyon ti umili iti rehiyon ken intero a pagilian, agtultuloy a pumigpigsang ti BHB bayat nga umab-abante ti gubat ti umili iti nangatngato a tukad. Kas kadagiti napalabas a rehimen, dagiti



deklarasyon ni Duterte ken AFP-PNP a “buraken” ti armado a rebolusyon ket ubbaw a panaglaslastog laeng iti desperado a gandat a makaala kadagiti nayon pay nga utang manipud kadagiti imperyalista a bangko ken panagpuonan

dagiti dadakkel a gangannaet a kapitalista tapno suportaran ti ekonomiya ti pagilian a nailumlom iti nakaro a krisis. Ti arapaap ti pasista a rehimen a “pulbosan ti BHB” ken “gibusan ti armado a pannakidangadang” sakbay ti tengnga ti 2019 ket sigurado a mapaay. Iti tengnga ti umir-irteng a krisis ti agruprupsa a malapyudal ken malakolonyal a gimong, ti tiraniko a rehimen a Duterte ket agturturong iti pannakapaay bayat nga adadda a maisinsina daytoy iti umili a Pilipino ken makitkita a mapadisi daytoy bayat nga umab-abante ti gubat ti umili iti nangatngato a tukad inggana a magun-od ti naan-anay a balligi.

# **Panagkabilaaw ti Cordillera People's Democratic Front (CPDF) iti maika-50 a tawen nga anibersaryo ti Partido Komunista ti Pilipinas**

Simon "KA FILIW" Naogsan  
Tagapagsarita  
Disyembre 26, 2018



Iti nagan ti amin a rebolusyonaryo nga organisasyon ken umili ti Kordilyera, ipadpadanon ti Cordillera People's Democratic Front (CPDF) ti naimpusoan a kablaaw iti selebrasyon ti maika-lima pulo a tawen nga anibersaryo ti Partido Komunista ti Pilipinas.

Iti sidong ti panangidaulo ti Partido Komunista, natadem a natudo ti naisangsangayan a problema dagiti nailian a minorya ti Kordilyera, ti naanay ken umannatop a pampulitika nga addang ken porma tapno marisut daytoy a problema ken nairut a nakasilpo daytoy iti kabuklan nga nailian demokratiko a rebolusyon nga iwaywayat dagiti rebolusyonaryo nga organisasyon ken kabuklan nga umili ti Pilipinas. Nayon pay, agtultuloy ti panagabante ti pannakidangadang ti umili ti Kordilyera laban iti imperialismo, pyudalismo ken burukrata kapitalismo ken laban iti nailian a panangidadanes para iti karbengan iti bukod a panggeddeng ken demokrasya. Iti las-ud ti uppat a pulo ken pito a tawen, naisaysayangkat dagiti nainsigudan a palaban a tradisyon ken nakapagpanday kadagiti baro a rebolusyonaryo a henerasyon. Naipasaknap ken rimmamut ti Partido iti naruarya nga umili ti Kordilyera.

Naipakita iti pakaistoryaan dagiti naballigi ken nabanuar a laban iti napinget a panagsalaknib iti aneutral a daga, biag ken kinabaknang. Karaman ditoy ti panangpaay ti panangitakder iti makadadael a Chico River Megadam ken ti panangpasardeng ti Cellophil Resources Corporation a manggamrud iti kinabaknang ken mangkalbo iti nalawa a bambantay ti Kordilyera. Naipagballigi dagitoy babaen iti nabileg nga armado ken saan-nga-armado a nagkaykaysa a pannakidangadang ti umili. Naipasngay ken napabileg ti CPDF iti tengnga dagitoy a pannakidangadang. Iti simmaruno a panawen ken inggana itatta, nagtultuloy a lablabanen ti umili dagiti kumpanya ti minas ken enerhiya ken dadduma pay a negosyo dagiti kapitalista ken imperialista a mangagaw ken manggamrud kadagiti aneutral a dagdaga ken natural a kinabaknang ti Kordilyera.

Naipagballigi met dagiti rebolusyonaryo a laban kontra iti panggep ti reaksyonaryo nga estado nga idadauloan dagiti agar-ari a dasig a manggudua-gudua iti panagkaykaysa dagiti umili ti Kordilyera tapno pakapsuten ti rebolusyonaryo a pakinakem a makidangadang. Insarua dagiti umili ti traydor ken kontra-rebolusyonaryo a Conrado Balweg ken

ti gangster a buyot na a CPLA nga agserserbi a makinarya dagiti agar-ari a dasig tapno pakaruen ti pasista nga atake ken nailian a panangidadanes kadagiti nailian a minorya nga umili ti Kordilyera. Pana-panawen a tumpaw ken lumned dagitoy depende iti kontra-umili a pakaaramatan ti reaksyonaryo nga estado kadakuada iti tay-ak ti kontra-insurhensiya a programa na. Napaay dagiti awan sarday a naulpit ken nakaro nga operasyon a kombat kasta met dagiti operasyon a saywar, panagallilaw ken panagpasuksok a gandat a parmeken ti rebolusyonaryo a tignayan iti Kordilyera. Naibutaktak ken nasuppiat dagiti naar-aramat a 'divide and rule' a taktika kairamanan ti "IP Centric Approach" ken "localized peace talks" iti kaudian ken iti imununa a panawen, ti "Kalinga Special Development Region", 'Presidential Guard Battalion' a guardya ti Cellophil Resources Corporation a napasasig a taga-Kordilyera, "peace zones", "Special Development Area", "bogus regional autonomy", kdp.

Paset ti biag-ken-patay a pannakidangadang ditoy Kordilyera ti natibker a panangidaulo ti Partido Komunista gapu ta nauneg a nakaramut daytoy iti naruarya a masa – kadagiti il-ili ken tribo, pagminasan, kanatengan ken dadduma pay a nalawa a kaawayan inggana kadagiti sentrong bayan ken syudad. Napabaked dagitoy babaen iti adu a sakripisyo ti umili. Nagaruyos ti adu a ling-et, naibukbok a dara ken naibuwis a biag dagiti banuar nga Igorot a nangsibogiti nagtaudan a daga. Daytoy ti nangpadam-eg iti naparnuay a paborable a kasasaad para iti rebolusyonaryo a pannakidangadang kasanguanan iti kumarkaro a panangidadanes ken pananggungundaway ti reaksyonaryo nga estado nangruna iti sidong ti agdama a terorista a rehimen a US Duterte.

Nu kinabaelan ti Partido Komunista ti Pilipinas a nangidaulo ti agtultuloy a pumigpigsa a rebolusyon a Pilipino iti las-ud ti limma-pulo a tawen kasanguanan ti awan sarday a naulpit a kontrarebolusyonaryo a panagatake, mamati ti CPDF a kabaelan tayo a sangoen ken abaken dagiti lokal nga agarari a dasig ken dagiti imperialista nga amo da iti masungad a panawen inggana naanay a maipagballigi ti demokratiko a rebolusyon ti umili ken agturong iti sosyalista a rebolusyon.

Rebolusyonaryo a Fetad! Rebolusyon Kayet!  
Agbiag ti Partido Komunista ti Pilipinas!



# FATHER NILO VALERIO CHAPTER CHRISTIANS FOR NATIONAL LIBERATION NORTHERN LUZON

Rev. Fr. Neo Padre Aglipay, Tagapagsarita  
FNVC, CNL-NL, Disyembre 2018



## **KANGATUAN A PAMMADAYAW ITI PARTIDO KOMUNISTA TI PILIPINAS ITI MAIKA-50 NGA ANIBERSARYO TI PANANGIRUSSUAT TI NAILIAN DEMOKRATIKO A REBOLUSYON!**

Daytoy a tiempo ti Paskua, ti Father Nilo Valerio Chapter (FNVC), kasta met ti amin a progresibo ken sumupsuporta iti CNL-NL iti intar dagiti Kristiyano ken simbaan kadagiti probinsya ti Amianan a Luzon, ket gammatan daytoy nga okasyon tapno padayawan ti Partido Komunista ti Pilipinas (PKP) iti naimbalitukan nga anibersaryo na a mangiyababante iti Nailian Demokratiko a Rebolusyon iti intero a pagilian.

Alaen tayo met laeng daytoy a gundawayan a padayawan ti adu a martir ken banuar ti umili a Pilipino. Maibilang kadagitoy a martir ket dagiti naggapu iti CNL a nakipaset iti panagabante ti NDR babaen iti armado a pannakidangadang ditoy Amianan a Luzon – kas kada Alfredo Cesar, Purificacion Pedro, Rev. Fr. Nilo Valerio, Rev. Fr. Zacarias Agatep, Amanda Alvarez, Filomena Asuncion, ken dadduma pay. Ipadpadanon met ti FNVC ti kangatuan a panagyaman iti PKP iti naanus ken awanan sarday a panagtarabay kadagiti Kristiyano ken panangipalawag iti programa ti demokratiko a rebolusyon ti umili ken ti paseten dagiti tao ti simbaan ken relihiyoso ditoy. Ti uppat a punto iti baba ti mangidatdatag ti batayan iti panagpadayaw ken panagyaman ti CNL iti PKP iti

maika-50 nga anibersaryo na.

UMUNA, bigbigbigen ti CNL dagiti Nalabaga ken nalaing a kadre ti PKP a nangtarabay ken timmulong kadagiti progresibo a Kristiyano, tao ti simbaan ken relihiyoso iti panangitakder ti CNL idi Feb. 17, 1972 nga anibersaryo ti pannakamartir da Padre Gomez, Burgos ken Zamora. Babaen iti CNL, napabaknang dagiti Kristiyano, tao ti simbaan ken relihiyoso ti kaammoan da iti NDR ken gubat ti umili. Dito met laeng a napatibker ti aktibo a partisipasyon ken suporta da iti panangitandudo, panangsalaknib ken panangilaban iti karbengan ken interes ti umili a Pilipino, nangruna dagiti mangmangged, mannalon, mangngalap, kababaihan, kabataan ken nailian a minorya, uray aniaman ti pammati ken nagtaudan da a puli.

MAIKADUA, padpadayawan ken agyamyaman ti CNL iti PKP iti panangrespetar iti relihiyoso a pammati, babaen kadagiti tungtongan iti baet dagiti komunista ken Kristiyano, ken panangipalawag iti NDR nga addaan ti sosyalista a perspektiba. Iti adu a pamuspusan, nalawlawagan ti CNL ken dagiti progresibo a tao ti simbaan ken relihiyoso maipanggep iti basaran a karbengan iti wayawaya iti panagpanunot ken pammati, a nailanad iti Tarabay iti



Panangitakder ti Demokratiko a Guberno ti Umili. Idekdeklara ti CNL a rumbeng a makikaykaysa dagiti Kristiyano kadagiti komunista iti basaran ti nailian demokratiko a programa. Iyaw-awis ti CNL kadagiti kameng daytoy a tuloy-tuloy a labanan ti Kristiyano a sobinismo wenno panangtagibassit ken ti kontra-komunismo iti intar ken labanan dagiti panggep ti kabusor a gundawayan daytoy tapno gudguduaen ti umili.

MAIKATLO, iti panangitakder ti Bagong Hukbong Bayan (BHB) idi Marso 29, 1969 tapno idauloan ken iyabante ti naunday a gubat ti umili agturong iti nangatngato a tukad tapno rebbeken ti agdama a malakolonyal ken malapyudal a sistema. Makikaykaysa ti CNL a ti armado a pannakidangadang ti kangrunaan ken mapangeddeng a porma ti pannakidangadang. Napateg ti armado a pannakidangadang gapu ta daytoy ti mangitakder iti demokratiko a bileg ti umili a mangrebbek iti estado dagiti agar-ari a dasig ken mangiyabante iti agraryo a rebolusyon. Babaen laeng iti armado a pannakidangadang a maitakder dagiti pundasyon ti sosyalista a gimong iti Pilipinas.

MAIKAPAT, iti panangidaulo ti PKP iti nailian nagkaykaysa a prente nga ibagbagi ti kadakkelan a konsolidado nga organisasyon a National Democratic Front of the Philippines (NDFP). Kas

kameng ti NDFP, naan-anay ken aktibo a supsuportaran ti CNL ti NDFP iti panangsuot kadagiti patakaran iti nagkaykaysa a prente – ti panagsanggir iti basaran nga alyansa ti mangmangged ken mannalon, panangallukoy iti agtengtengnga a saray ti burgesyia, ken pananggammak kadagiti bettak iti intar dagiti reaksyunaryo tapno isina ken padisien ti kakaroan a reaksyunaryo a bunggoy ti agar-ari a dasig. Ti kinaepektibo dagitoy a patakaran ket naipakita iti panangpadisi kadagiti rehimen ti diktador a Marcos idi 1986 ken ti korap a rehimen Estrada idi 2001.

Iti las-ud ti nasurok dua a tawen ti termino ni Duterte, rinibribu a marigrigat nga umili a pakairamanan dagiti mangmangged, mannalon, nakurapay iti syudad, nailian a minorya, kababaihan ken kabataan ti inapatay ti reaksyunaryo a militar ken pulis ni Duterte babaen iti tallo a gyera na. Karaman kadagiti napapatay ket tallo a padi a Katoliko – da Fr. Tito Paez ken Fr. Richmond Nilo ti Nueva Ecija ken ni Fr. Mark Ventura manipud iti Cagayan. Gapu kadagitoy a tallo a gyera nga inaldaw a mangbikbiktima iti umili a Pilipino, agbalbalin a ni Duterte ken ti kontra-umili a militar ken pulis ti kadadakkelan a rekruter ti BHB ken mangpadpadakkel kadagiti platun ken kumpanya ti Nalabaga a hukbo iti amin a rehiyon.

Kadagiti sumarsaruno a tawen, itultuloy ti CNL ti kontribusyon na a mangpamulat iti umili lalo iti sektor ti simbaan iti pangkasapulan, kinalinteg ken kinalehitimo ti armado a pannakidangadang. Kasapulan a mairupir ti kinapudno a nainkalinteg ti panangdepensa iti karbengan ti pagilian ken umili iti uneg ti agdama a kasasaad. Kasapulan a maipakita ti kinapateg ti armado a pannakidangadang lalo itatta nga inserran ti agturturay a dasig ti ruangan iti nainkappiaan a panangrisut kadagiti basaran a problema ti umili, nga isu ti ramut ti armado a labanan.

Gapu kadagiti naurnong a rebolusyonaryo a balligi ti NDR ken naunday a gubat ti umili ken ti kumarkaro a krisis ti malakolonyal ken malapyudal a gimong a Pilipino, agtalek ti CNL iti intero a pagilian a ti PKP ken intero nga umili a Pilipino ket kabaelan na a maipangato ti NDR ken ti naunday a gubat ti umili iti nangatngato a tukad iti umay a tawen ken sumarsaruno pay inggana a magun-od ti naan-anay a balligi iti intero a pagilian.

Agbiag ti Partido Komunista ti Pilipinas!  
 Agbiag ti National Democratic Front of the Philippines!  
 Agbiag ti Christians for National Liberation!  
 Tumipon iti Bagong Hukbong Bayan!  
 Iyabante ti gubat ti umili iti nangatngato a tukad!

# **RAMBAKAN TI NAIMBALITUKAN A TAWEN TI PARTIDO KOMUNISTA TI PILIPINAS ITI PANAGSERBI ITI UMILI A PILIPINO!**

DIEGO WADAGAN  
Tagapagsarita  
Agustin Begnalen Command  
BHB-Abra

Disyembre 26, 2018



Napnuan ti ragsak ken kangatuan a panagsaludo ti ipadpadanon ti Komiteng Larangan iti North Central Abra ken dagiti Nalabaga a kumander ken mannakigubat ti Agustin Begnalen Command (NPA-Abra) iti panagselebrar ti umili a Pilipino iti maika-50 nga anibersaryo ti pannakaitakder ti Partido Komunista ti Pilipinas (MLM). Daytoy ti naimbalitukan a tawen ti naregget a panagserbi ti komunista a Pilipino iti umili.

Talaga a napnuan kaipapanan ken signipikante dagiti nagun-od a balligi ti Demokratiko a Rebolusyon ti Umili iti intero a pagilian ken iti saklaw dagiti larangan iti Abra. Dagitoy a balligi ket gapu iti husto a panangidaulo ti ing-ingunguten tayo a Partido a tartarabayan ti teorya ken praktika ti Marxismo-Leninismo-Maoismo. Dagitoy a balligi ket utang tayo kadagiti rebolusyonaryo a banuar a nangidaton ti biag para iti tarigagay ti umili. Ti rebolusyonaryo a kinabanuar dagiti annak ti Abra, manipud iti nadumaduma a paset ti rehiyon nga Ilocos-Cordillera ken intero a pagilian ket agserserbi a narimat a bituen iti tangatang a simbolo ti namnama, ken iti masakbayan ket magun-od ti wayawayaya.

Iti probinsya tayo, nagrugi ti rebolusyonaryo a trabaho ti PKP idi 1973. Daytoy a panangirugi ket inpasngay ti kasasaad nga agturturay ti “landok nga ima” iti intero a pagilian iti uneg ti diktadura a US-Marcos. Pinang-iggeman dagiti kabataan a kameng ti PKP ti nalabaga a libro ni Kadua a Mao Zedong kas tarabay, nakiranget iti narigat ken kapapatgan a tukad ti panangipundar ti bin-i ti rebolusyonaryo a pigsa ti umili ken ti panagbukel ti Bagong Hukbong Bayan iti intar dagiti tribu nga Itneg ken idi bimmayag ket simmaknap inggana iti intar ti masa nga Ilokano iti saklaw ti kapatagan. Gapu iti kinaganus, dimmalan iti narikut a proseso ti panangipraktika ti teorya ti panangitakder ti base ken sona a gerilya, namin-ano a binirok ti Partido ti husto nga addang tapno agtignay ti naganus pay laeng a Partido ken Hukbong Bayan iti daydiay a panawen. Iti panagdalan ti panawen, simmaknap ti nagkaykaysa a prente nga anti-Marcos kadagiti sentrong bayan, naawis ken nakilaok dagiti agtengtengnga a puersa iti gubat ti umili no sadino ket signipikante a paset ti nagkameng iti Bagong Hukbong Bayan. Kagiddan ti pasista a panagturay ni Marcos ket simmaknap dagiti proyekto a diktar ti imperyalismo nga US. Mangisinsinyal dagitoy a kasasaad iti nakaro a kinarigat ken panaggil-ayab ti armado a pannakidangadang iti Abra. Naimarka iti pakasaritaan ti narimat a pannakidangadang ti panangsalaknib ti umili nga Abrenio iti ansestral a daga ken karbengan idi natured a nilabanan ken pinadisi ti higante a korporasyon ti panagtroso ti Cellophil Resources Corp. (CRC) a nangsaklaw iti nganngani amin a bambantay iti Abra idi dekada 80. Ti gerilya a pannakidangadang ti umili babaen iti BHB ken Milisyang Bayan karaman dagiti komite iti depensa, ti sapsap a pannakilaok dagiti tribu nga Itneg ken panangidaulo ti PKP dagiti tulbek a salik kadagitoy a balligi.

Naimarka met ti rugi a panang-iggem dagiti nakurapay a mannalon iti intar dagiti tribu iti Nalabaga a Bileg Pampulitika iti panangitakder kadagiti Municipal Councils of Leaders (MCL) ken Village Councils of Leaders (VCL) a mangbukbukel iti Rebolusyonaryo a Gubyrno ti Umili. Naipakita ditoy a babaen iti panagkaykaysa dagiti maidadanes a dasig ket maitakder ken mapanday dagiti marigrigat ti bukod da a gubyrno.

Ti naurnong a pigsa ti nagkaykaysa a prente iti uneg ti Cordillera People’s Democratic Front (CPDF), pumigpigsa a BHB ken panangidaulo ti Partido ket nagbalin a pundasyon tapno paayen manen ti pananggamgam dagiti agrurutap nga aplikasyon dagiti higante a kumpanya ti panagminas manipud dekada 90 inggana iti baro a milenyo. Nagbalin a pukkaw ti umili ti “Biag, Daga ken Dayaw, Ilaban” ken “Karbengan para iti bukod-a-pangngeddeng!”

Nagballigi ti panangirussuat ti Maikadua a Naindaklan a Tignayan



iti Panangilinteg iti intero a pagilian. Nangiduron daytoy ti amin a benneg a panagabante iti tayak ti ideolohiya, pulitika ken organisasyon ti rebolusyonaryo a tignayna iti Abra. Manipud iti tedda ti disoryentasyon ket pinang-iggeman manen ti Partido ken BHB ti panangiyabante ti tallo a ramen ti naunday a gubat ti umili. Gapu iti panagregta manen dagiti panagadal a pang-ideolohiya ken pampulitika ket napagkaykaysa manen ken naipangato ti kamulatan ken pangngeddeng ti masa iti panagsuporta iti armado a pannakidangadang babaen iti panagpasampa kadagiti annak da iti BHB. Ti bassit a platun ket napardas a dimmakkel ken dimmanon iti pigsat kumpanya a larangan gerilya a nagbalin a bin-i iti panagbukel pay kadagiti baro a larangan iti saklaw ti intero a probinsya.

Naparegta manen ti panangitakder kadagiti bin-i ti Demokratiko a Gubyerno ti Umili iti tukad dagiti komunidad ken tipak. Inpasngay ti daytoy a tignayan ti panagbukel kadagiti programa iti pampulitika, pang-ekonomiya, pangsalun-at, pang-edukasyon ken pang-organisasyon iti intar ti masa. Signipikante a bilang dagiti ili ti nabenebisyoan ti agraryo a rebolusyon babaen kadagiti nagtitimpuyog a panagtrabaho, panagpalawa kadagiti payaw, panangirussuat kadagiti sosyo-ekonomiko a proyekto, ken dagiti serye ti pannakidangadang para iti panangipababa ti abang iti daga ken interes ti pautang, panangipangato iti sueldo dagiti mangmangged-talon, umdas a padanum, ken panangipangabak iti laban ti umili kadagiti daga a ginamgam ti kumpanya ti CRC iti upland ken lowland Abra.

Inkagumaan a nilabanan ken pinaay ti BHB iti Abra ken intero nga Ilocos-Cordillera dagiti OPLAN ken kampanya dagiti napalabas a rehimen. Makaadadal dagiti Nalabaga a kumander ken mannakigubat iti gerilya a pannakigubat babaen iti panangirussuat kadagiti taktikal nga opensiba laban kadagiti narurungsot nga operasyon ti mersenaryo nga AFP-PNP-CPLA-CAFGU nga agserserbi a guardia dagiti lokal a warlord ken dadakkel a kapitalista a kumpanya. Dagiti naurnong a kapadasan kadagiti opensiba ken dependensiba a labanan ket agserserbi a nabias a kapadasan ken pagad-adawan ti adal. Iti lasud ti 50 a tawen a panangirussuat ti reaksyunaryo a gubyerno kadagiti panangdadael ken panagkamat ket nagtalinaed a nakatakder ken agtultuloy a pumigpigsat ti PKP, BHB ken ti nagkaykaysa a prente. Daytoy ket gapu iti nauneg ken nalawa a suporta ti umili iti rebolusyonaryo a tarigagay ken gapu iti nakaro a pannakabulok ken panangparigat ti reaksyunaryo a gubyerno iti masa.

Kadagiti lugar no sadino ket napigsat ti impluwensya ti rebolusyonaryo a tignayan ket mamentinar ti linak ken panggimong nga hustisya no ikumpara kadagiti lugar a saksaklawen ti AFP-PNP-CPLA-CAFGU ken dagiti goons dagiti napeklan a warlord-pulitiko a nakaro ti tinnakaw, droga ken

dadduma pay a kriminalidad. Inrussuat ti BHB ti rebolusyonaryo a prosesot hustisya ken panangdusa kadagiti dakes nga elemento kas kadagiti kuraddog, agramrames, ahente ti militar, napeklan a warlord, dagiti iligal a panagtroso ken dadduma pay.

Nairut a napang-iggeman dagiti kadre ti Partido ti unibersalateorya ti Marxismo-Leninismo-Maoismoken awan bannog nga agpurpursigi iti panangiyaplikar iti kongkreto a kasasaad. Maysa kadagiti kapatgan a rebbengan itatta ti pananglagom iti nagbalin a kapadasan iti maysa a dekada tapno ramuten dagiti partikular a lapped iti panagabante ken ad-adda a makagiddan kadagiti baro a karit iti pananggunod kadagiti rekisito tapno maipangato ti naunday a gubat ti umili agturong iti tukad ti estratehiko a panagpapatas.

Iti panangirussuat ti tignayan iti panangilinteg ket immuneg manen ti panagramut ti PKP iti intar ti masa nga anak ling-et. Naiyaplag kadagiti baryo ken munisipyo ti Sangay ti Partido ken dagiti subseksyon inggana tukad seksyon. Iti bangir dagiti nakakaro nga atake militar ken dagiti Oplan dagiti aso-aso a rehimen ket narimbawan dagiti organo ti Partido dagiti gandat iti panangdadael ken conversion. Karit kadagiti kameng ti Partido iti agdama ti naregget a panagadal, praktika ken panangisabak iti pannakidangadang tapno labanan ken paayen manen ti diktadura a US-Duterte. Napanday ti Partido iti atiddog a pannakidangadang ken kanayon a masubsubok ti takder ken kinatibker na daytoy iti baro a tukad ti pakasaritaan ti naindasigan a pannakidangadang. Tapno maiballigi ti programa ken panawagan ti maikadua a kongreso ti PKP, nangruna iti amin ket kasapulan ti nairut a panagkaykaysa ti mangidadaulo a komite a pairtengen ti panangikonsolida, panagpalawa ken panangipadur-as ti gerilya a pannakigubat.

Nalawag kadtayo ti nasken a rebbengen a rebbeken ti imperyalismo, pyudalismo ken burukrata-kapitalismo babaen iti Demokratiko a Rebolusyon ti Umili babaen iti naunday a gubat ti umili, itakder ti Demokratiko a Gubyerno tu Umili, ken iyabante ti sosyalista a rebolusyon inggana a mapunas ti amin a tipo ti panaggundaway.

Kadagiti umay a tawen, ad-adda nga ikagumaan dagiti rebolusyonaryo iti saklaw ti larangan tayo tapno makagiddan iti amin a benneg a panagabante ken panangibalanse ti pagrukodan ti pigsat ti rebolusyonaryo nga intar iti intero a pagilian.

Agbiag ti 50 a tawen ti panagserbi ti Partido Komunista ti Pilipinas iti umili!

Agbiag ti Marxismo-Leninismo-Maoismo!

Agbiag ti gubat ti umili!

Agbiag ti umili ken rebolusyon a Pilipino!

# Nalabaga a panagsaludo iti maika-50 nga anibersaryo ti Partido Komunista ti Pilipinas!

Ka Magno Udyaw

Tagapagsarita

Leonardo Pacsi Command

BHB-Mountain Province

Disyembre 26, 2018



Addaan iti nangato a dayaw, salsaludoan ti Leonardo Pacsi Command (LPC) ti Partido Komunista ti Pilipinas (PKP) iti panagrambak iti maika-50 nga anibersaryo na daytoy. Sidadayaw a laglagipen mi dagiti naindaklan a nagun-odan ti Partido ken ti rebolusyon iti napalabas a 50 a tawen.

It-ited mi ti kangatuan a pammadayaw iti amin a martir, kakadua iti Partido ken BHB a nangidaton ti biag da para iti nailian demokratiko a rebolusyon. It-ited mi met laeng ti kangatuan a panangipateg kadagiti elders, dadaulo ti tribu, lider ken masa a nangidaton ti biag da para iti dangadang iti bukod-a-pangngeddeng ken demokrasya iti sidong ti nailian demokratiko a rebolusyon. Salsaludoan mi ti saan a matebbag a komitment, nangato a pakinakem ti panagsakripisyo ken panagpursigi dagiti kadre ken kameng ti Partido, Nalabaga a kumander ken mannakigubat, lider ken dagiti masa a kameng ti amin a rebolusyonaryo nga organisasyon masa.

Ti pamunuan ti Partido Komunista ti Pilipinas ket napaneknekan a napateg iti amin a rebolusyonaryo a panggep ti umili a Pilipino ken para iti panagabanteti nailian demokratiko a rebolusyon agturong iti balligi ken sosyalismo.

Absoluto nga idadauloan ken padpadur-asen ti PKP ti BHB iti Marxismo-Leninismo-Maoismo nga ideolohiya ti proletaryado isunga saan a marebbek ti BHB ken ad-adda a tumibtibker iti kangrunaan a panggep nga iyabante ti gubat ti umili. Pinaay ti BHB ti amin a naglabas a pasista a rehimen a nanggandat a mangrebbek ditoy iti napalabas a lima a dekada. Ti BHB ket raraemen ti mayorya ti masa a Pilipino kas kakaisuna a Nalabaga a hukbo da iti pannakidangadang laban kadagiti apo't daga ken dasig a dadakkel a burgesya, ti imperyalista ken ti pasista a turay. Ti BHB laeng ti kakaisuna nga armado a puersa a lumablaba para iti soberenya ken demokrasya, ken para iti karbengan dagiti nailian a minorya iti bukod a pangngeddeng laban iti nailian a panangidadanes ti estado.

Tinarabayan ti Partido ti panangiyaplag ken panangpalawa ti gubat ti umili iti Cordillera ken ti panagbukel ti Nalabaga a bileg pampulitika ti umili nga Igorot. Iti kangitingitan ti linteg militar

idi tiempo ti diktadura a US-Marcos manipud 1971 inggana 1982, nalukatan ti sona a gerilya ti Mountain Province manipud iti ekspansyon ti Ifugao, kagiddan ti panagpalawa idiy Benguet, Abra, Kalinga ken Apayao. Ti militante a dangadang ti umili laban iti Chico Dam, iti Cellophil Resources Corp. ken pasista a rehimen a US-Marcos ket immirteng babaen iti armado a pannakidangadang manipud 1983 inggana 1985 a nangpaatras kadagitoy a kontra-umili a proyekto. Dagiti elders ken dadaulo ti tribu ket nangpatignay iti ginasgasut nga umili ti tribu ken kabataan agturong iti panagpasampa iti BHB. Mano a batalyon a milisyang bayan ti napaadu ken nangpatibker kadagiti puersa a kumpanya ti BHB. Iti daytoy a pannakidangadang, nalawag nga inpakita ti Partido iti nailian a minorya iti Cordillera a ti rebolusyonaryo nga armado a pannakidangadang ti mapangeddeng iti panaglaban iti imperyalista a panaggamgam iti kinabaknang ti aneutral a daga, pasismo ti estado ken panagbaybay-a.

Babaen iti panagtarabay ti Partido iti naregget a panagsukisok ken panagamiris ti dasig iti Cordillera, naitudo a tapno marimbawan ti nailian a panangidadanes ken maipagna ti bukod-a-pangngeddeng ken demokrasya dagiti nailian a minorya, ti dangadang da ket kasapulan a maitipon iti dangadang ti umili a Pilipino iti panaglaban iti pyudalismo, burukrata kapitalismo ken imperyalismo. Inlawlawag ti Partido a dagiti Igorot ket karaman kadagiti mannalon, mangmangged ken marigrigat nga umili a Pilipino a magungundawayan iti uneg ti malakolonyal ken malapyudal a gimong ken ti nailian a panangidadanes ket nayon a panangidadanes ti estado kadakuada iti uneg daytoy a sistema ti gimong. Daytoy ti nangilinteg iti kamali a “gubat a nailian a minorya” a nganngani a naipisukan dagiti Igorot. Ti “gubat a nailian a minorya” ket mangibagbaga a naisina ti gubat ti nailian a minorya iti Cordillera basar iti suhetibo a panagamiris nga awan ti risiris dagiti dasig iti Cordillera. Pinagkaykaysa ti Partido dagiti nasinasina a tribu ti Cordillera ken nangidaulo iti gubat laban iti husto a kabusor da: dagiti imperyalista ken kakumplot da nga apo't daga ken dadakkel a burgesya kasta met iti reaksyunaryo

a guberno a mangipatpatungpal kadagiti linteg a mangipalpalubos iti agtultuloy a pananggamrud dagiti dadakkel nga imperyalista iti natural a kinabaknang ti Cordillera. Ken babaen met laeng iti tarabay ti Partido, nabaelan ti BHB a lappedan ken isina ti traydor ken oportunist a Cordillera People's Liberation Army ken iti laksid ti riribuk a pinartuat na daytoy iti uneg ti rebolusyonaryo a tignayan, pimmigsa latta ti armado a pannakidangadang iti rehiyon.

Insanay ti Partido ti BHB nga epektibo nga ipatungpal ti tallo a napateg a ramen ti gubat ti umili iti kongkreto ken partikular a kasasaad ti Cordillera – ti panagbukel kadagiti rebolusyonaryo a base ken organo ti bileg pangpulitika, agraryo a rebolusyon ken armado a pannakidangadang. Idadauloan ti Partido ti BHB iti panangriing ken panangpatignay iti masa a mannalon tapno ipatungpal ti agraryo a rebolusyon kas kababagas ti gubat ti umili. Katinnulong ti masa a mannalon ti Partido ken BHB iti panangitudo ken panangrisut kadagiti agraraira a porma ti malapyudal ken pyudal a panaggundaway kadakuada. Dito Mountain Province ken iti Cordillera, sangsanguen dagiti mannalon ti problema iti usura ken panaggundaway dagiti traders, nadagsen nga abang iti daga, nababa a sueldo dagiti mangmangged-talon, kinakurang ti subsidyo ken serbisyo a panggimong ken agricultural, ken ti agkurkurang ken naladaw a panangipaay iti relief ken rehabilitation kadagiti nadidigra ti kalamidad. Mainayon pay dito ti kangrunaan a problema iti kinakurang ken kinababa ti produktibidad ti daga a sukayen ti dakkel a bilang dagiti mannalon iti Cordillera. Mangpakaro pay dito ti ar-aramiden dagiti higante a kumpanya iti minas ken enerhiya a pananggamgam kadagiti aneutral a daga ken rekurso.

Tumultulong ti BHB a mangbukel kadagiti rebolusyonaryo nga organisasyon masa kasta met iti panangpapigsa iti Cordillera People's Democratic Front kas rebolusyonaryo nga alyansa dagiti mangmangged, mannalon ken amin a demokratiko a puersa iti Cordillera. Kas resulta ti naregget a panangiyabante iti agraryo a rebolusyon ken ti panaglawa ken panaguneg dagiti rebolusyonaryo a base, dagiti kabataan a mannalon ket sumamsampa iti BHB kasta met a lumawlaw dagiti milisyang bayan.

Agyamyaman unay ti BHB iti PKP iti panangidaulo iti komprehensibo a panangilinteg kadagiti pang-ideolohiya, pangpulitika ken pang-organisasyon a kamali ken kakapuyan tapno umabante ti gubat ti umili itinangatngato a tukad. Babaen iti panangidaulo ti BHB, determinado ti BHB a rimbawan ti konserbatismo militar ken makagungun-od kadagiti balligi iti panangisayangkat kadagiti taktikal nga opensiba laban iti AFP ken PNP kas resulta na daytoy. Pinang-iggeman ti Leonardo Pacci Command, kasta met ti dadduma a yunit iti uneg ti Chadli Molintas

Command ti inisyatiba iti panangdusa kadagiti puersa ti AFP ken PNP a sumsumrek kadagiti aneutral a teritoryo ken komunidad, kasta met iti panangdusa kadagiti makadadael a kumpanya a Lepanto, Philex ken Hedcor.

Iti napalabas a limapulo a tawen, saan a nabaelan ti nagsasaruno a rehimen a pinarmek ti PKP, BHB ken ti rebolusyonaryo a tignayan masa manipud idi naibangon daytoy uray iti kaulpitan a panawen ti diktadura a US-Marcos. Ken itatta, ti natibker a panagmartsa iti las-ud ti 50 a tawen ket karkariten ti pasista ken aso-aso a ni Duterte. Pirmi unay ti danag ti rehimen a US-Duterte iti umir-irteng nga armado a pannakidangadang ken ti dalluyon ti dangadang ti umili. Ti deklarasyon da a rebbeken ti BHB inggana iti gibus ti 2018 ket agturong iti pannakapaay, gapu ta maidurduron da a pairtengen ti kontra-rebolusyonaryo a gyera babaen iti Oplan Kapayapaan ken Martial Law.

Ti krisis ti malapyudal ken malakolonyal a gimong a pakpakaruen ti kontra-umili, maka-imperyalista ken pasista a patakaran ti rehimen a US-Duterte ti obhetibo a basaran para iti panagabante ti armado a rebolusyon ti umili. Dagiti neoliberal a patakaran ti rehimen ket ad-adda a mangisaltekt iti atrasado nga agrikultura a pangal-alaan ti umili ti Cordillera iti basaran a pagbiagan, ken manglapped iti nailian nga industriyalisasyon. Laplappedan ti rehimen ti panangusar ken panangtrabaho ti umili kadagiti natural a rekurso ti aneutral a daga tapno agserbi dagitoy a kinabaknang para kadagiti kumpanya ti minas ken enerhiya. Kasta met nga ipokpokus ti AFP ti kontra-rebolusyonaryo a gyera iti rehiyon babaen iti IP-centric approach iti intar dagiti Igorot ken panangkalub iti rebolusyonaryo a pannakidangadang babaen iti propaganda a “peace zone” ken repormista a proyekto.

Ti nailian a minorya iti Cordillera ket addaan iti natan-ok a pakasaritaan ti panangirussuat iti gubat tapno gun-oden ti bukod-a-pangngeddeng ken demokrasya. Tinarabayan ti Partido ti daytoy a narimat a tradisyon babaen iti panagramut kadagiti maidadanes nga umili ken ti panangiyabante iti dangadang ti amin a nailian a minorya iti pagilian ket nagbalinen a paset ti 50 tawen a balligi ti Partido. Ken itatta, itudtudo ti Partido dagiti sangsangoen a karit iti agdama tapno ad-adda a maiyabante ti gubat ti umili agturong iti estratehiko a panagpapatas.

Rambakan ti naimbalitukan nga anibersaryo ti PKP!

Papigsaen ken sumampa iti BHB!

Itag-ay ti natan-ok a tradisyon ti pannakidangadang dagiti Igorot para iti bukod-a-pangngeddeng ken demokrasya!

Patibkeren ti pangngeddeng nga iyabante ti nailian-demokratiko a rebolusyon nga agturong iti sosyalismo!



## **Agbiag ti naimbalitukan nga anibersaryo ti Partido Komunista ti Pilipinas! Agbiag ti 50 a tawen ti tuloy-tuloy a pannakidangadang ken narimat a balligi!**

**Cordillera People's Democratic Front-Mountain Province**

**Disyembre 26, 2018**

Itatta a tawen ti panagrambak iti maika-50 a naimbalitukan nga anibersaryo ti Partido Komunista ti Pilipinas (PKP) a tartarabayan ti Marxismo-Leninismo-Maoismo (MLM). Daytoy ket panagrambak iti lima a dekada ti awan-sarday a pannakidangadang ti proletaryado a Pilipino ken umili para iti pudno a wayawaya, demokrasya ken hustisya.

Iti las-ud ti lima a dekada, nakagun-od ti PKP kadagiti naindaklan a balligi a pakaibilangan ti panangitakder ken panagsaknap dagiti organo ti rebolusyonaryo a bileg pangpulitika iti intero a pagilian. Gapu ditoy, naballigi nga indauloan ti Partido ti gubat ti umili babaen iti panagkaykaysa ti masa a mannalon ken ti dasig a mangmangged. Ti panagdalluyon ti rebolusyonaryo a pannakidangadang ket dimmanon inggana kadagiti kangangatuan a bambantay ti Cordillera. Idi 1970s, iti katengnga ti diktadura a Marcos, dagiti umuna a kadre nga Igorot ket narekrut iti PKP ken naatasan nga agsubli kadagiti tribu ken ili a naggapuan da tapno rugian ti panangpamulat ken panagorganisa kadagiti nailian a minorya iti Cordillera.

Nasaririt nga inadal ti PKP ti teorya ti MLM, inamiris ti kongkreto a kasasaad ti gimong a Pilipino a malakolonyal ken malapyudal, ken intudo dagiti kabusor ken gayyem ti rebolusyon a nangidataga kadagiti basaran tapno maikeddeng ti Partido ti demokratiko a rebolusyon ti umili kas kakaisuna a solusyon iti panagrigrigat ti umili a Pilipino. Inlawag ti PKP a ti madama a demokratiko a rebolusyon ti umili ket baro a tipo gapu ta daytoy ket idauloan ti dasig a proletaryado babaen iti Partido Komunista ti Pilipinas ken addaan iti sosyalista a perspektiba.

Daytoy nga husto a linya ket nagserbi kas armas para kadagiti nailian a minorya iti Cordillera ken kadagiti kadre ken kameng ti PKP tapno epektibo a matubngar ken ilaksid ti mananggudua ken manangallilaw nga indigenista a linya ni Conrado Balweg ken ti Cordillera People's Liberation Army (CPLA). Iliblibak ni Balweg ken ti CPLA a ti malapyudal ken malakolonyal a galad ti gimong a Pilipino ket makikita iti rehiyon ti Cordillera. Ipilpilit da a dagiti komunidad ti Igorot ket addaan iti malakomunal ken malakolonyal a galad ken ti risiris dagiti dasig ket saan nga agraraira iti intar dagiti Igorot. Irisiris

da a ti panaggundaway dagiti tagapatag iti nailian a minorya ti Cordillera ti kararamut ti panagrigrigat dagiti Igorot. Naibutaktak ti kontra-rebolusyonaryo ken oportunista a panggep ti paksyon idi indeklara da ti panagbukel ti "Cordillera Nation" nga idauloan da. Iti agdama, ti tedda ti CPLA ket naan-anay a naipauneg iti Armed Forces of the Philippines. Ti madama a rekrutment na ket addaan panggep nga agserbi kas makinarya iti umay nga eleksyon 2019 ken tapno ipresentar ti bagi kas armado a puersa panseguridad ti agdama a kampanya ti rehimen a US-Duterte a bogus nga awtonomiya iti Cordillera, ken tapno makaala da ti bingay manipud iti pangpubliko a pondo a para iti didiay a rutap manen ti burukrasya.

Ken itatta, ti panagamiris ti PKP a ti Cordillera ket naan-anay a naipaunegen iti malapyudal ken malakolonyal a gimong a Pilipino ket saan a mapagduaduaan ti kinahusto. Sagsagrapien dagiti Igorot ti nakaro a panaggundaway kangrunaan manipud iti tallo a problema ti gimong a Pilipino – ti imperyalismo, pyudalismo ken burukrata kapitalismo. Ti nailian a panangidadanes a ti tallo a batayan a problema met laeng ti makagapu ket nayon a bakbaklayan da. Ti umili a Pilipino karaman dagiti Igorot ket addaan iti komon a kabusor.

Babaen iti panangitandudo ti MLM, nabaelan ti PKP nga intudo dagiti bukod a kakapuyan ken pagkurangan, ken nairussuat dagiti panagdillaw ken panagdillaw-iti-bagi ken nangipatungpal kadagiti tignayan iti panangilinteg tapno mapadur-as ti rebolusyonaryo a praktika. Babaen ditoy, nabaelan ti Partido nga ilinteg ti nadumaduma a porma ti empirismo, konserbatismo ken burukratismo iti intar ti rebolusyonaryo a tignayan.

Magungun-od ti agdama a gubat ti umili ti dadakkel a balligi gapu iti absoluto a panangidaulo ti PKP iti BHB. Sipud pay idi tiempo ti dangadang ti umili ti Bontoc, Sadanga ken Kalinga laban iti Chico Dam ken ti dangadang dagiti Tingguian laban iti Cellophil, nagbalin a katinnulong dagiti Igorot ti Partido ken BHB tapno magun-od ti nalawlaw a panagkaykaysa tapno abaken ti komon a kabusor. Babaen kadagitoy a pannakidangadang, naamiris ti umili ti kinahusto ti panagarmas laban kadagiti managgamrud, ken babaen laeng iti nailian demokratiko nga armado a pannakidangadang a naan-anay a madepensa



dagiti Igorot ti ansestral a daga ken mailaban ti karbengan iti bukod-a-pangngeddeng. Kadagiti simmaruno a dekada, immirteng ti panaggundaway, panangidadanes ken militarisasyon iti Cordillera iti uneg dagiti nagsasaruno nga aso-aso a rehimen, a mangidurduron iti umili a makipaset iti armado a rebolusyon. Itatta laeng a tawen, dagiti yunit iti uneg ti Chadli Molintas Command ket nangirussuat kadagiti taktikal nga opensiba a mangpaay iti arapaap ti rehimen a US-Duterte a mangpunas iti BHB iti 2018.

Ti panangitakder iti Cordillera People's Democratic Front (CPDF) idi 1989 ti maysa kadagiti naindakan a nagun-odan ti PKP ken umili ti Cordillera. Ti CPDF ti kongkreto a mangibagi iti rebolusyonaryo a panankidangadang dagiti Igorots. Daytoy ket alyansa ti amin a demokratiko a dasig ken sektor iti rehiyon. Tumultulong met laeng ti CPDF iti masa nga Igorot iti panangitakder ti rebolusyonaryo a guberno kadagiti tribu ken komunidad. Inton sumaruno a tawen, iselebrar met ti CPDF ti maika-30 nga anibersaryo ti pannakaitakder na.

Inggana iti agdama, ti PKP ti mangidadaulo a mangtarabay ken mangipatpatungpal iti agraryo a rebolusyon tapno solbaren ti nadumaduma a porma ti pyudal ken malapyudal a panaggundaway iti masa a mannalon a mangbukbukel iti mayorya ti umili a Pilipino. Babaen iti kolektibo a panagtignay, nabaen ti masa a labanan ti dumakdakkal a bilang dagiti managdadael ken managgamrud a kumpanya a mangpadas a mangiyaramid kadagiti operasyon ti proyekto a minas, dam ken geothermal energy iti rehiyon. Lablabanan ti umili ti agtultuloy a panangipaidam ti estado iti karbengan ken panagusar da iti natural a rekurso babaen kadagiti managgundaway a linteg kas iti PD 705 wenno Revised Forestry Code, Mining Act of 1995, EPIRA, Renewable Energy Act, ti Small Scale Mining Act ken dadduma pay. Ad-adda a nagkaykaysa dagiti Igorot tapno padur-asen ken padakkelen ti produksyon. Iti panagsaplit ti super typhoon Ompong a pinasarunuan ti Rosita, nalawa ti saklaw ti nadadael nga agricultural a daga, imprastruktura ken sanikua. Ti naan-anay a rehabilitasyon dagitoy a dadael ket magun-od laeng babaen iti kolektibo a panagtignay ti masa a mangilaban iti umdas a serbisyo manipud iti reaksyunaryo a guberno.

Saan a marukod dagiti balligi a nagun-od ti PKP iti uneg ti 50 a tawen. Napaneknekan ti Partido ti kinahusto ti rebolusyonaryo a teorya ti Marxismo- Leninismo-Maoismo. Naipakita a nadayaw, nainkalinteg ken saan a maliklikan ti armado a pannakidangadang babaen iti gubat ti umili tapno magun-od ti pudno a wayawaya, demokrasya ken hustisya. Ti PKP ti adda iti sangoanan ti sangalubongan a proletaryo a rebolusyon a mangitagtag-ay iti bandera ti sosyalismo kas husto ken kasayaatan a dana ti makidangadang a masa. Iti agdama, agserserbi ti PKP kas ehemplo ken inspirasyon iti dadduma a pagilian a mangtartarigagay ti wayawaya, demokrasya ken hustisya.

Aw-awisen ti CPDF ti umili ti Cordillera a makikaykaysa iti umili a Pilipino iti panagranbak iti 50 a tawen ti tuloy-tuloy a pannakidangadang ken narimat a balligi. Selebraran tayo ti balligi ti PKP iti panangidaulo iti umili a Pilipino agturong iti dalan ti pudno a wayawaya, pangmabayagan a kappia ken hustisya, maibilang ti pannakidangadang dagiti Igorot para iti bukod-a-pangngeddeng ken demokrasya. Iti maika-50 a tawen ti Partido, patibkeren tayo ti pangngeddeng nga iyabante ti nailian demokratiko a rebolusyon agturong iti balligi ken ti kasaruno a sosyalista a rebolusyon.

# SINGKWENTA

Ka Espat  
BHB-Ifugao

Sa ikalimampu  
Tayo'y magdiriwang ng pasasalamat  
Sa dakilang proletaryong kilusan  
Sa pagbibigay ng liwanag sa gabing  
Mapanglaw ng karukhaan at kasalatan

Sa ikalimampu  
Tayo'y magdiriwang sa gitna ng mga  
Kahirapan na tila unos na bumibigwas  
Sa ating hanay, ang sinag ng ginintuang  
Maso at karit ang syang tanging armas

Sa ikalimampu  
Magdiriwang tayo ng higit na pagkakaisa  
Mula sa hiwa-hiwalay na ideya at praktika  
Sa pagbagtas sa masalimuot na batas  
Ng pakikidigma.

Sa ikalimampu  
Magdiriwang tayo ng may  
Pagpupugay sa limang dekada  
Ng mga dakilang aral sa mga  
Kabiguan at tagumpay

Sa ikalimampu  
Tayo'y magdiriwang upang salubungin  
Ng may panibagong proletaryong sigla  
At pag-asa ang limampung ginintuang taon  
Ng Partido Komunista!

